

摘藻堂四庫全書薈要

集部

欽定四庫全書薈要卷一萬五千七百四

集部

誠齋集卷一百二十七

宋 楊萬里 撰

墓誌銘

鈐轄趙公墓誌銘

公諱不獨字彥親濮安懿王四世孫也曾王父宗隱贈
太師潤王王父仲癸贈少師莘王父士譚贈武勝軍節
度使公自總角儀觀秀傑端重寡言以五月五日生莘

王每異之曰此吾家千里駒也以蔭補左班殿直政和三年授成忠郎添差西京永寧縣酒稅建炎元年光堯登極轉忠翊郎二年以京西北路制置司辟命權知西京永寧縣事兼總轄軍馬時北騎南牧所在盜起永寧當敵衝公毅然以維城為已任繕脩戰械峙糧立壁振作士氣屢立戰功鄰邑相繼不守公境獨全紹興三年內外阻絕西京遂陷公與弟不庶不忙率公族及鄉里豪傑各塹山為砦以拒敵來則禦去則襲一日偽齊步

軍太尉王勝大軍候至遠近震擾公挺身與戰屢捷七年糧盡援絕勢不能復支遂率所部數千人南歸天子嘉歎賚予優渥特轉四官令吏部授優異職未幾轉武節郎又轉武德郎授建康府兵馬都監制曰趙某忠義可嘉又曰以勸臣節公在建康威名焯著盜斂屏迹留守晁謙之倡諸公間論薦章交公車轉武功郎歷撫吉南康臨江兵馬都監官吉者再公屢摠材官習熟軍法操切吏士威信斬斬匹馬夕擷獄市寧一偷兒相戒曰

是嘗赤手抗敵何可犯也三十年轉武翼大夫衡州兵馬鈐轄上即位轉武經大夫主管台州崇道觀後轉武節大夫吉州兵馬鈐轄再遷武德大夫光堯聖壽七十湛恩轉武功大夫公雖帝王子孫而少歷行陣精騎射善用兵孫吳之書口講心計洞達奇正沈涵策謀臨機料敵冰解雪釋每誦賈生語曰何不試以臣為屬國請必繫單于笞中行說輒太息北嚮髮上衝冠及南北罷兵公亦老矣戎馬既息易以詩書羣居燕閒黃冠縵服

投壺奕棊一觴一詠市書充棟用訓子弟風流文雅翩翩佳公子也天性仁厚方在洛金人所過必屠遺帑橫道公見之躬取藁裡掩之雖在兵間不忘愛物嚴不重傷勝不多殺晚喜浮屠吻爽盥漱清坐齋如禮佛焚香嘿誦梵語淳熙三年九月辛未卒年七十一十一月某日葬於吉州城北螺子山女冠平之原配徐氏累封安人男善搏秉義郎監潭州南岳廟先公卒女二人長適成忠郎新岳州平江巡檢管鎔次早世孫男四人長曰

汝弼承節郎新監潭州南岳廟次曰汝諧汝賢汝翼皆以公蔭補官孫女四人長適李純次許嫁徐淇王珏王希尹汝弼以公族子善滂所論次行實來謁銘銘曰維嵩之蒼維洛之茫鞠為秋香趙公之斃不粒不兵身作之城有焯者節有煒者烈日光玉潔位不公侔名不公訓峙於茲丘賁彼柏楸

鬱林州教授毛嵩老墓誌銘

嵩老毛氏諱惠直其先三衢人八世祖侍御公為吉州

太守道出吉水之龍城愛其佳山水官滿遂家焉歷四
世而生九皋九皋生綺綺生理俱不仕理字平國生二
子季曰惠明長則嵩老也平國性簡澹落落然與世若
不相接以是家窮空嵩老少長強學授徒以業其家於
是親若弟始忘其貧平國死惠明亦早世嵩老字其孤
終身嫠妹孤甥煢然無歸嵩老皆聚而衣食之嵩老既
壯文名彰施再貢於鄉登進士第授左迪功郎主邵武
縣簿太守以嵩老儒先厚禮之光澤縣令某以非罪繫

獄部使者命嵩老往鞫之令憇不能自白使所親語嵩
老願毋周内深文嵩老笑曰所坐有無在彼所當輕重
在令甲我何預焉既至取具獄閱之皆文致譴辭也即
平反之用薦者授左從政郎漢陽軍漢川縣令縣故荒
餘又承兵亂公私赤立嵩老畢力撫摩民得少蘇尉某
獻拊克之策嵩老謝不納尉懟甚思所以害嵩老者夜
遣卒斧縣庫盜官緡錢事覺跡至尉所人謂嵩老將甘
心必痛繩治株連及尉嵩老曰吾知求盜爾既得盜又

何求太守某黷貨諸邑爭剥民以諂之嵩老獨否守怒

求嵩老罪百端竟無有然誅貨未已嵩老喟曰與其賂
民以自安無寧去官以安民兩言決爾遂引疾上還印
綬漢川之民遮留莫可既去俸之未給數十萬錢嵩老
曰吾棄官尚言祿漢川之民至今思之授鬱林州州學
教授以上登極恩加左文林郎鬱林瘴癘地士不知學
嵩老曰人謂教官無職事育人材非職事耶日入黌宮
為諸生講古今聖經賢傳口授指畫士得所宗始競於

學中州文風五嶺不隔而嵩老不幸死矣蓋隆興二年七月十有三日也於是嵩老生六十九年矣嵩老於鄉黨其族親之貧不自振者子弟之弱不樹立者可教教之不可教者覆護之嵩老焉依以就其才安其家者豈少也然類負嵩老嵩老不怨不悔亦不改為初配張氏繼室羅氏廬陵名儒天文之女有淑德既歸嵩老傾橐中裝治生梱內之政不以毫髮累嵩老男二人良臣良弼學有雋聲方增而未已者也女一人適進士曾晞說

孫男三人長曰靈運餘未名嵩老既葬良臣尋卒乾道
辛卯八月某日良弼改葬嵩老於等岡山之原先事移
書走都下以左從政郎吉州錄事叅軍謝諤狀來請銘
某與嵩老有連習熟其賢其銘曰

嵩老之仕其征無車嵩老之沒其燾無廬嵩老之廉其
獨無俱矜彼之腴嗤吾之臞後千斯年誰之潔汙老驥
斯殂亦龍其駒其驤超如此其昌乎

故承事郎通判鎮江府蔡公墓誌銘

公諱湍字子東莆之仙遊人曾大父諱襄端明殿學士

禮部侍郎贈吏部侍郎大父諱旻宣義郎贈少傅考諱
伸左中大夫贈光祿大夫光祿四子公其長也公以門
子為將仕郎尉台之天長郡守畢良史材之羅致幕下
頃之宅憂免喪尉台之寧海邑多盜皆數於海晝則魚
潛夜則虎冠公以嚴治盜發輒得境以清寧州上功狀
授承務郎知池州貴池縣貴池於邑為劇公更平寬邑
人宜之然不可干以私大官要人為姦利者噤莫敢伸

庚寅無秋江淮流民道殣相望元夕守欲出遨符縣張
燈公曰此遊觀時耶竟不奉命大江之瀕因渚為田議
征其畝州縣奉詔並緣侵牟朝廷知之乃命有司歸田
於毗除租於官適議成為部使者沮格成命公爭不可
力請於朝以南卒被上賜使者怒欲當以重劾爬羅癥
疵毫毛莫得也居二年弟洸給饟江東公以嫌引去除
通判鎮江府未之官乙未冬得上氣疾明年正月疾革
命其子戡武曰譚墅先墳也我死葬焉庶幾從先人於

地下疾少間家人咸喜公忽屏醫藥曰我生止今日爾
乃盥櫛更衣拱而危坐隱隱聞鼻息聲俟而逝實丙申
正月二十有九日也得年五十六官至承事郎諸孤以
其年四月二十七日葬公於武進縣懷德鄉從公命也
公性闇通明敏幼所佔畢耄而不忘其事親慤孝其律
已嚴毅平生見利縮縮然嘗曰富非吾志姑紓吾貧有
田二頃歸耕何卜先是光祿以清白遺後之人不事生
業而公為吏狷且廉歷官半世而在官之日僅五稔故

其家貧甚衆指數百自奉甚薄寧窮不一折節人不堪
憂公晏如也既沒家垂索諸孤以賻市棺斂焉公衷方
襖圓粹溫如春善與人交一見傾蓋人人自以得公重
比其歿也莫不隕涕公娶方氏封孺人長子曰戡覃思
道學下筆超穎舉進士甲科授簡文館上言水旱所召
上嘉其忠擢秘書省正字因賜對極陳士大夫敢言者
非好名乃愛君善類怙焉今為承議郎新知道州次曰
武績文應進士舉女六人長適進士鄒彥謙先公卒次

適迪功郎新德安府應山縣尉孫敏問次適通直郎知
江陵府松滋縣張稜次適張元渙次適胡鑒次尚幼孫
男一人康女二人丁酉之夏某來守毘陵戡以戶部尚
書沈所狀公行實來請銘某雖不及上堂拜公而與戡
同朝甚善又不得辭乃為之銘銘曰

士無巧愚惟珍爾迂惟疚爾諛蔡公卒瘞不寧其軀本
本有初而祖君謨其貞玉如公其肖諸不薺而荼不刈
其觚宜甃而軀靡究其塗而嗇其攄厥聲則都

王南鵬墓誌銘

南鵬諱翊世家廬陵之宣溪蓋其先仲舒觀察江西其子孫有家焉者其別為宣溪之王云南鵬兄弟四人其長邦英業儒得官南鵬蚤游庠校有聲射科未有就逢靖康之亂兄弟奉其親轉徙兵間亂定南鵬年已逾壯乃得一官非其志也因棄去歸隱故山老焉乃傾厥家市書萬卷闢館百楹爰誨子弟爰來士友畫趾其堂寶森裾織壺觴淋浪高吟大喙夕耳其牖經聲史音咏歌

千祀既飫既酣南鵬角巾埜服逍遙是間送鴻揮絃其

樂無央皋壤山林凡四十年其或歲祲人過厥糴我廩

我困傾倒既竭縮估不贏氓泣其仁昏友族親以窶來

歸乃克乃求不懈益劬里有狡焉非意我干匪校伊愉

彼則風休狡自罟獲既玷於誅或憇於余盍噦之乘我

畀之哂忤是憇者南鵬乾道九年二月二十九日卒年

八十二屬纊不亂猶進子孫教訓以善言訖而逝以淳

熙二年正月二十三日葬於宣化鄉山塘之原曾祖贄

祖居父珙初娶樊氏繼室劉氏二男秉直秉國女適蕭
汝稱孫男十一人揚名厚揚祖琳芻揚善揚仁揚烈揚
武揚庭揚輝女五人曾孫男十二人女十四人夫人二
子一女皆先卒秉國補登仕郎厚琳芻皆預薦而琳再
上餘皆學蓋方昌而未已也萬里舊聞秉國有父風而
琳又有一日雅琳父子以從政郎興國軍教授李侯盛
所論次南鵬行實來謁銘銘曰

有耄彼松于澗之中不匠而槁雪霜雨風茁是孫枝既

灌既繁孔秀孔妍遷彼景山宣溪之王其承方碩謂淑
不天盍覲斯石

蕭嶽英墓誌銘

公諱許字嶽英蕭氏其先自唐丞相復觀察湖南其子
儉留家長沙六世而徙廬陵其後武寧令霽子煥國初
徙白沙今遂為吉水人自定基與其孫服相繼入為御
史至公之曾祖汝賢為將作監主簿蕭氏遂為廬陵大
家公服之從孫也祖公瑾不仕父昂以公贈承務郎公

七歲知屬文鄉先生李端臣一見期以偉器年十二三
有聲郡學三舉於禮部不第今天子嗣位慶賴海內公
特奏名授將仕郎公事親無遺恨獨恨親不及祿既受
則喟曰白頭非折腰具於功令選調者六考老焉則爵
父母吾得藉手下泉其可矣初調監常州犇牛鎮犇牛
中切邦甸外通徭場行李還往孔道攸出大農之供歲
五百萬大賓儲侍則又稱是踐厥職者聞罷自勉非慮
則懦凡二十輩蓋廣出狹入官吏並緣刻剝市利虐取

苛征商民其咨問道以逋官用告匱公既蒞至搜蠹剔
弊白之郡將自詭刮磨稅外乾沒罔不滌除曾不旬時
商旅走集初年增至千萬明年二十萬又明年乃三千
萬時北鄙有釁天兵濯征虎符羽檄夙宵崇降塗出毘
陵州不乏與犇牛焉依葉丞相衡實典是州嘉公之才
論薦於朝迺移公為無錫令奏令為真會公秩滿力請
解自以犇課最增秩從政郎監潭州南岳廟戶部接近
比懋賞符州錫錢四百萬公辭不受嶽祠秩滿調全州

清湘丞改常德府武陵丞官期至公雅不欲之官則請
老於朝上有旨以通直郎致其仕淳熙三年春光堯慶
壽恩加奉議賜五品服故事仕而告休者半其俸太府
檄鄉郡廩之公辭焉是歲十一月朝廷有事於南郊大
賚臣庶公以籍列遂得追秩考妣如公始願則欣然曰
吾志畢矣奏牘既上未幾以疾卒年七十有五方子孫
侍疾涕泣不止而公神氣清爽顧曰吾無一物以遺子
孫平生所學得中庸二字今以遺汝言訖而逝公嘗客

臨安同舍多鄰曲前因縣令楊元皋病棘則皆棄去公獨留晝夜助其子謁醫元皋死又助其喪紀其急義類此公配某氏先卒贈孺人男一人特起其出也孫男六人必得必因必簡必取必恭必東女一人適進士李棣特起將葬公於吉水墨潭之上以奉議郎知袁州分宜縣謝諤之狀來請銘於某則哭而銘之曰

邳隆之階何聘非瓌何斲非材何刈非萊嶽英之才而不逢哉墨潭之隈堂斧斯嵬松柏斯哀疇不永懷

李縣丞叔周墓誌銘

叔周諱邇叔周其字也李氏先吉水人後徙洛以贈少師諱章者為曾祖以贈少傅諱百朋者為祖而左中奉大夫諱元孺之子也中奉累贈至正議大夫叔周年六十四卒於從兄迎明州通判之署積階至奉議郎而所更者通仕郎從仕郎文林郎承直郎通直郎終官知贛州興國丞而所更者監秀州華亭稅監秀州酒揚州節度推官吉州軍事推官知潭州安化縣初靖康南渡叔

周為敵所得屈叔周使拜不可且曰吾家世荷國恩可為敵屈敵怒擊叔周首流血且死遇天雨得蘇其任華亭稅以父憂不赴其任秀州監酒日叔周被檄視潦舟行民田中問所主曰監司圭田也吏側目搖手不敢以潦聞叔周曰水潦為患上供且應復況圭田乎盡復其租常平使者鄭公某聞而奇之又被檄覆視平江府經界時立法嚴甚胥吏鄉正並緣為奸高下定賦不以實閱叔周躬行田畝悉為正之使得其均吳人德之歸日埜

夫羅拜於道有具香火送叔周出境揚州帥向公子固
馭吏如束濕獨樂叔周之賢將首薦焉時錄事叅軍施
興祖且更盡而薦員未具請於向向曰今歲止一牘將
薦從事李君媿不君及叔周在傍亟曰願先薦施向以
為長者從其請施以是得先改京秩吉之材官以主將
掎克一夕潰議者欲調外砦兵捕之叔周曰此輩非有
憾於州郡招之則定激之則叛郡守葉公仁用其計潰
者果歸民用不驚安化舊令逋府錢數百萬既辭滿羈

縻不得去叔周白帥張公孝祥願解縱代者當庚所逋

張公高其誼代者即解既而沈公介代張公有不悅於
張怒及所與有攝尉董邵者以私謁不遂譖叔周於沈
叔周自免去既調興國未之官而沒初正議歿時家有
餘貲叔周既仕則悉以委諸昆弟不吝一錢也嘗攝楚
州寶應尉適有旨捕淮北逸寇甚急叔周獲四人詔加
官一列故事選調有武功受此詔者即為京官叔周曰
以一人命為功吾不忍也置而不問及以薦改秩叔周

曰吾不奉詔今亦改官叔周有雜詩百餘篇皆慷慨憤
激一飯不忘君之語初娶劉氏繼趙氏皆先卒子男四
人長天次純綸約女四人長未嫁卒次適朱備及保義
郎黃良能及進士楊楫皆趙出也孫男二人大中大昌
叔周卒之日無田一畝無宅一區其柩旅殯於霍川其
子純無所于歸以叔周嘗官於吉吉其所甚愛者且趙
夫人之墓在今居焉純將返柩以葬於吉之馬岡山趙
夫人墓之左前期以吾弟楫之狀來謁銘銘曰

朔狄方獫烈賴不折讒夫孔多平陸九河無晦可耜無
錐可置斃斃孫子將焉置此霸異之魂歸哉丘墳裏我
後人尚享其屯

陳先生墓誌銘

先生諱維字子綱姓陳氏鎮江金壇人也曾考元朝散
郎致仕贈朝奉大夫王考廓登進士第朝奉大夫提點
利州路刑獄公事考威登進士第終文林郎知真州揚
子先生早失所怙母蔡夫人殿中侍御史蹈女也念陳

氏孤未樹立厲節自苦拊育訓誨有底有造年十三游鄉校試藝輒最譽問藹然諸先生愛之曰幸哉陳氏有子紹興丁巳方與計偕數試禮部無遇子從古幼而穎異先生歎曰吾有志無成成吾志者必在吾子家本窮空至為從古求師則鬻別業以行束脩人皆難之從古既策上第先生喜曰吾祖孫射科三葉矣何必我躬晚乃以恩得官主信州弋陽簿竟不赴隆興甲申從古既籍朝列先生於令甲當行封曰吾老得其一官未能及

親今先自及安乎奏上輒止先生讀書不顯決科抉斷
根株探索源泉尤邃於詩孤澹古雅適追陶柳一時名
士如蘇養直呂居仁韓子蒼張處父皆忘年友故養直
嘗稱曰子綱好古博雅結交皆天下知名士云先生急
義拯物瀕死不疚不侵然諾聞人一善躍如以喜然資
素剛是是非非有昭無聾理所徇者鼎貴必爭毅色正
辭折恧其人鄰曲有競必就而正決以片言靡不悅服
蓋其素履服仁食義身中繩墨言中榘矱人皆諶之非

一日也金壇之征藝菽有布毗不病輸而病不均先生
曰我乃無田言之無嫌倡邑之人白之有司復除十半
太守寶文閣學士劉公子羽以書謝先生曰見仁人之
用心從古始尉富陽迎先生就養邑有點胥受賕獄具
縣令所憎欲瘐死之先生諭從古使力爭胥竟免有中
人倚勢漁牟學田從古欲直之質諸先生先生曰當官
而行何畏焉從古以獲海盜當改秩先生戒之曰以盜
得官前輩不忍汝其力辭先生雖布衣善論天下事每

從容商確今古成敗利害如卜筮算如秉燭火位不才
侔士者喈之先生恥言利家徒四壁併食易衣妻子慍
見先生泊如也家無長物獨藏書數百卷先生嘗自贊
曰貌乎槁癯形乎侏儒外褊忤物中空洞而無隅至於
為人之所不為而不為人之所為庶幾古之愚者歟暮
年深詣理學得喪死生如覺言夢嚶然不能入其中既
疾子孫在旁則告曰吾必勿起吾所藏書勿逸於儲勿
墮於鋤以淑而軀言畢坐而逝云享年若干先生娶譚

氏大理少卿知柔女也生三男從古承議郎前差監行
在左藏東庫學古稽古俱舉進士一女歸中書舍人張
志之子興宗孫男六人伯震仲吳叔謙伯泰季咸季益
孫女四人先生之歿以隆興二年十一月二十五日其
葬以乾道元年九月十四日其兆在縣之唐安鄉茂成
村揚子府君之墓側後十五年從古書先生遺事泣以
告其友楊萬里屬以銘詩銘曰

之德之學古彥所作播播其詞泐泐其詩麟卧弗馳十

駕先之彼羣其飛覆此之嗤弗對弗咨與古而嬉不沽
乃玉亦不毀於櫝卒完其璞以對於先覺觀我於庭乎
而其蘭其芝其茁離離伯也最怒是若其父方垂天而
翦式與其宇

胡英彥墓誌銘

澹菴先生胡公以道德文學師表一世仁濡義染丕變
大江以西而其宗族家庭俊茂尤角立其好學刻深厲
操清苦克肖先生者猶子英彥也英彥諱公武年十三

為黨庠春秋弟子員一試出諸先生上郡博士汪侯劉
夙舉之吃吃也招為春秋師似夙學者英彥覃思經訓
鉤沈聖處出入百氏洞視根穴至論道原獨謂求聖道
當自論語始以韓子始孟為非是乃取賈誼揚雄李翱
等解為集註論語若干卷傳以新意自鄭康成王肅馬
融之外史漢所引臣瓚顏祕書輩所註釋闕文異義靡
不裒萃成一家言今叅政周公甚愛其書為之序性嗜
文尤工於詩其句法祖元白而宗蘇黃追琢光景繪事

萬彙金春玉應山高水深獨造其極晚日號學林居士
澹菴先生賡符讀書城南韻以勗之蜀人何子應亦寄
以詩而予亦嘗為賦之云其論文格不苟如范浚明尤
所厚者嘗以書與之上下其論往復千里歲在癸巳嬰
末疾自是沈綿無瘳後六年卒實淳熙六年十二月晦
也享年五十有五有詩若干篇詩話若干卷論語叢書
三卷又集音兩卷文髓十卷註蘭臺及淮海詞各若干
卷曾祖諒故將仕郎祖方中父宗古皆隱不仕娶劉氏

故丞相楚公沆之曾孫男四人据槁杙枕皆志學女適
劉德行鄧執規次許嫁蕭景衡餘尚幼据將卜葬英彥
於某所其兄箕狀其言行來謁銘銘曰

嗜古入骨琯句得髓不爵不齒竟以窮死既獲乎此又
覩乎彼不曰責天終無已吁

誠齋集卷一百二十七

欽定四庫全書薈要卷一萬五千七百五

集部

誠齋集卷一百二十八

宋 楊萬里 撰

墓誌銘

羅价卿墓誌銘

予外舅羅公天文以詩學鳴政和間為橫舍明師自天文至其曾孫瀛繼繼里選者十有二人策第者六人元亨仲謀父子仕皆不達至价卿其文方昌其德方茂其

聞方焯士友謂大天文之家在是矣年五十有二淳熙八年正月望一疾而卒天乎痛哉初价卿父子同薦名而价卿為詩學舉首再舉與兄弟六人同升三舉擢進士第未擬官居父憂復居母憂毀瘠逾制除喪授迪功郎南雄州保昌縣尉始至湖北寇逸入江西將犯廣東提點刑獄司業林公光朝宿重兵南雄禦之价卿謁曰南安前章貢後賊來南雄將焉寄徑惟韶州仁化其徑有三曰朱子巖曰九曲巖其險可守曰芙溪長岡其地

坦夷寇所必趨盍遣一軍為覆以待之可燭也林公從之賊果至大破之廣東轉運使司厥貢惟銀異時歲以緡錢十五萬市於州縣近歲止給三一官無自出始以民產高下征之民弗堪適林公遷轉運副使价卿謁曰緡錢日朘而銀如初不剥民焉取之盍請諸朝使盡給異時緡錢之數則一路蒙福林公嘉歎即席草奏薦之公車韶之樂昌有眊詣部使者言其令盜所臨部使者怒遣价卿廉之至則以無罪告部使者疑其有所左右

移价卿乳源尉下其事司敗凡三易官典理其獄令竟
得釋秩滿造朝見丞相衛國史公浩極論二廣煮海改
法之弊請一用舊章又作平邊策論戰守疏民瘼欲興
內治以俟天時丞相奇之用薦者陞秩從政郎調監行
在省倉中界門既歸日聚族子弟尊酒論文澹如也官
期將及未赴而卒价卿性簡而厲言動從繩靜以御繁
勇以行義里閭族鄰欲辨曲直有不之官府而之价卿
者一語曉之聞者意沮其猶子子琳與劉振英貧而無

教則迪之以文其鄉曲小民以饑歲不能自給則書其名數而廩之以粟二弟曰維申曰維翰皆自幼教之既而維申薦名維翰與价卿同日擢第人咸曰价卿之教父之既沒悉舉先疇以遜二弟曰堇堇足矣奚以多為廬陵縣令梁君兌聞之為文以風流俗而二弟亦固辭不受盡以給族親之貧時稱義門云价卿居官秋毫不苟保昌學署燬盡椽亟白縣令啟度一新春秋釋菜禮用無曠講武營表鞠為櫟棘擘張逋播存者十五价卿

既至習射有亭築場有垣逋者來歸旗幟精明見謂稱
職价卿諱維藩廬陵人曾祖仇祖紱字天文父上達字
元通母李氏娶蕭氏男一人澥弱冠與里選女一人適
進士楊奎予叔父麻陽知縣子也女孫一人尚幼有古
今賦二卷詩十卷史論一卷平邊策四卷詩解二卷左
傳說二卷論語解二卷雜著六卷棣華纂二十卷目曰
印山集卒之歲十二月庚申澥奉价卿之喪葬於吉水
縣鄉曰同水原曰醴泉前事來請銘予泣曰予出入舅

家二十年耳而銘元通元亨元忠仲謀矣今又銘价卿
乎銘曰

惟文惟德后帝所嗇多取奚益汝文斯施汝德斯碩汝
聞斯白探珠既獲歸覲其宅則毀其壁而祖之澤厥世
有奕尚暝汝宥

王舜輔墓誌銘

君諱大臨字舜輔姓王氏醉軒其自號也系出臨川自
高祖徙吉家焉今為吉水人曾祖景視大丞相荆國文

公為從祖教授於吉從者傾一州龍圖蕭公世京太傅
彭公燮著作楊公純師皆從之授業著書數百卷號塾
民集祖端禮幼以文名元祐三年蘇公子瞻孔公經父
孫公莘先知貢舉而秦少游黃魯直張文潛晁无咎諸
公皆佐春官第去取於是策第仕止賀州富川令有易
論語傳父鴻舉以文行再薦於鄉號非老人君生而護
落有大志不肯入小學老人不之強建炎中北騎南牧
老人避兵為敵所掠君年十二三唬跌以從行數十里

老人得脫歸與盜遇盜欲兵之君抱持老人號呼請代羣盜義而免之時州里新被兵跬步斂數君度單弱不能自達因說羣盜乞護送還舍請謝錢萬盜許之君乃前行陰結里中少年嚴兵伏間左盜以老人至諸少年譟而出拜庭下問故老人云云諸少年目盜欲縛之君稽首曰吾父免矣可若何乃殺一豕貰斗酒遣盜讐而去不敢索一錢年十六七始奮於學日誦數千言自經史外虞初小說道家釋氏之書無不貫穿沈浸尤熟於

左氏傳與三國七朝史口講指畫若身履然紹興庚午
客永和鎮館於曾氏會贛卒以城叛民訛言寇至曾氏
欲徙以避之君設三策以料賊乃不果徙鎮賴以寧未
幾寇平悉如君言晚歲號是是翁自放於酒燕處之室
名曰醉軒又號醉軒居士酣嬉淋漓萬事不省得錢不
計多寡悉送酒家不足則裘褐衣襦悉捐以予之不計
直客有具衣冠儼然造焉則箕踞慢罵不容口行遇田
夫野父輒強之使坐與為賓主為說經義論古今不能

休父謝不能解乃笑聽去淳熙己巳冬十二月望屬疾
詔諸子曰明年吾不復此矣至正月朔晝漏未盡一刻
而逝得年七十娶蕭氏故御史家也男子四人子仁子
俊子偲子信女一人適歐陽次周孫男七人少愚少魯
少愿少忠少慤餘尚幼孫女四人諸孤將以其年之月
日葬君於所居之東胡塘之原前期子俊以朝奉郎提
舉行在文思院曾三復所狀君之行來謁銘子俊嘗從
子游義不得辭則諾而銘諸銘曰

陟彼糟丘天風颼颼望彼醉鄉大荒蒼蒼八仙于疆于
廬于糧舜輔從之酌其天漿駕麴車而追歡伯御閭風
而超扶桑拘拘者方哭送其遺蛻又焉知舜輔之不亡
吁仲尼之門不用酒也如仲尼之門用酒則太白入室
舜輔升堂者耶

陳擇之墓誌銘

君諱琦字擇之陳氏清江人祖宗禮以高年賜爵迪功
郎父善明經尤邃於易君幼刻苦自奮必欲續聞既冠

以易學再貢擢乾道丙戌第主衡州衡陽簿未上張公
考祥帥澤愛其材招與之俱因從南軒先生張公栻受
學焉及官衡陽有殺人於野而主名不立提點刑獄鄭
公責游徼甚急吏迹一驛卒其襜有血掠訊誣服吏獻
之鄭鄭下之州詰之皆不寃州下之邑君攝邑疑之初
診屍得死者稠署曰羅仲美君即揭諸衢有見而哭者
曰吾子也蓋仲美與其族弟餘皆商而仲美貲倍餘殺
而取之君逮餘辭服白之鄭釋驛卒由是名聞一路郴

饑官糶無紀人相蹂死部使者命君往賑之書當糶者
伍之而畀以一券日許一人持券遞遞以糶簡而周整
而無譁諸郡法焉用薦舉循從事郎調贛州贛縣丞南
軒先生帥桂招君攝募府廣西郡計仰漕司鹽子錢漕
輒嗇帥以聞請益下漕漕輒格會漕闕帥攝漕君贊帥
歲增諸郡子錢十三邕歲市大理馬馬來已二千里自
邕達諸軍又倍故多道斃桂舊有圉君請憩而飼之瘠
者止良者行後者至先者發馬用不耗帥辟奏為真不

報既至贛太守尚書留公正待以客縣賦不給每訟不
直者令入金錢君首除之官錢曰經總制者隸提點刑
獄司有使者析秋毫計一路逋錢大萬君亟言曰此錢
舊制所無借未能除不失凡最足矣今又益之可乎媿
而止部使者列其治於朝詔中書書其姓名用薦舉轉
宣教郎知贛州興國縣未上會留公制置四川辟掌機
宜文字西南夷舊為蜀患近時復創馬市歲不能徹戍
議者欲用利路義士法什伍黎雅之民如李德裕雄邊

子弟以代更卒朝廷下其議制置司檄君經紀之君言

其不可兩州之士無慮六千盍析為二擇壯者二千以

備邊餘以居守則民可用戍可徹蜀法榷酒錢日折估

者病民上欲損甚下蜀議制置檄君益昌定議君上書

總領馮公憲詞甚懇切卒減緡錢三十萬初蜀之民私

以楮券為貨謂之交子至天聖中官始權之再歲一易

謂之交界其後有司並緣巧取凡券之微壞者皆沒入

之不賂不易蜀之兵為屯十有八所隸之將三士之廩

給當折物為錢者必視其所屯之地稱其土物之直以
直之低昂為錢之多寡故米之估則龍州得仙人關之
半絹之估則興元得西和州三之一銀之估則大安得
龍州之半而過之乃有軍在某州之屯反用他州之估
者故軍多怨讟留公憂之乃與君謀杜交界之奸以信
楮券平廩給之估以慰士心君雖在遠而賢稱日至於
朝近臣有欲薦君為郡而君死矣人皆惜其用之不盡
也君天資敏而靜密而寬遇事迎刃而解亦不自功事

至不拒事已不有聽訟從明決訟從恕與人言若無所拂而實有所規事上官細粗通介不同不為逢迎每言輒聽與同寮處如家人不見崖異亦不詭從君自受學於南軒進進日新嘗扁其齋曰先南軒銘焉其屬意於君蓋甚遠云為文章覃思深湛詞乃夷易尤工於詩得江西體年四十有九淳熙十一年五月二十有六日卒於官明年二月其孤返柩自蜀九月丁酉葬於建安鄉古堂之原娶曾氏子三人男復之渙之女適郭琛皆舉

進士孫三人二男一女復之不遠二千里走行在所以
太學博士彭龜年所狀君之行謁銘於某某與君雅故
敬銘之曰

猗嗟擇之其挾不訾其趨不卑南軒是師趾其堂基衷
其壁圭一笑而歸將遐其蜚而早其披侯豐其資侯嗇
其施云誰之司

太宜人蕭氏墓誌銘

太宜人蕭氏吉之西昌人故安遠主簿王季安之妻也

季安即世太宜人以勤儉齊家以詩禮迪子淑問益茂
家政益葺自壽皇帝聖時尊親錫類大賚海內若大夫
若士若氓父母高年者詔縣以姓名上之郡郡上之朝
賜爵行封有差吉州以夫人年德高劭應書初封太孺
人再封太安人新天子御極湛恩龐洪三封太宜人絲
綸褒表式如金玉象服焜燿有嚴山河族親州里咸以
手加額以太宜人為師太宜人自幼在父母家以柔嫗
聞既歸季安王氏在廬陵族大家昌季安砥行好脩以

不及當世之賢而知名者為恥傾身下士傾家序賓其門長者車轍常滿其堂日具數百人之饌而其室落然若無人聲以故士多從季安游季安潛伏巖谷之下而其聞彰焯江湖之外里中以賢多太宜人太宜人每退然恐不勝也長子邦義季安前室黃所生也仲子孚季子仁皆季安季年所生太宜人拊掬顧復人以為三子一母三子亦云然也太宜人生以崇寧甲申丁巳沒以紹熙庚戌八月癸巳得年八十有七將瞑與其子訣問

其所欲言者勉以孝悌葬以十月巳酉地曰蕭塘曾祖
某祖某父桂三男邦義脩職郎先卒孚保義郎仁承節
郎五女適將仕郎黃文郁胡懿文林郎劉伯源嚴可久
譚鳳孫男女八人藉嶠嶼有德峴岵某嶠舉鄉貢進士
女一人適脩職郎李如圭曾孫男六人大年于大保大
彌大方大有大女五人適劉揚祖張淵餘幼先事孚走
一价行李以從政郎主管刑工部架閣文字雷孝友之
狀來中都謁銘於某某職在太史銘之為宜矧與孚游

最故銘曰

人鮮克壽姚九其齡壽鮮克貴三命其承有子有孫有
孫有曾盍高其閔後當有興

誠齋集卷一百二十八

謹案卷一百二十六第三頁後一行婦道則盡於
義原本義訛詩据別本改

第十頁前六行夢遇三男於田原本遇訛道据別
本改

第十八頁後七行茅補子惠按此四字疑訛


第二十七頁後八行洞視聖秘原本脫聖秘二字

据別本增

第二十八頁前一行夏秋侯卿云云按疑有誤

卷一百二十七第六頁前六行嗤吾之臞原本嗤
訛吟据別本改

第十一頁前六行孔道攸出原本孔訛空据別本
改



總校官庶吉士臣張能照
校對官庶吉士臣陳崇本
膳錄監生臣王以謹

欽定四庫全書薈要

集部

誠齋集卷二百

二十九至
三十一

詳校官助教臣謝登雋



欽定四庫全書薈要卷一萬五千七百六

集部

誠齋集卷一百二十九

宋 楊萬里 撰

墓誌銘

夫人趙氏墓誌銘

夫人趙氏保義郎廬陵王孚信臣之妻濮安懿王之七世孫華原郡王仲佺之曾孫武翼大夫隆興府兵馬鈐轄不忙之女也夫人自幼警敏年十有六歸信臣事舅

姑夙夜寅恭其理家有綱有條下至醯醢調膈米鹽靡
密締紵織紉必躬必手人不知其天宗之貴也信臣禮
賢下士賓客滿門殆無虛日夫人為具豐儉等衰率與
信臣意合劍佩鏘鳴杯杓淋浪日昃夜艾夫人無惰容
垂索倒廩其室屢空信臣交游半天下聲聞日焯夫人
益喜路鈴公暨伯兄相繼淪謝諸孤方稚夫人與信臣
畢力經紀其家今二弟皆駸駸宦塗所至有稱人謂路
鈴公有賢女云信臣少力學既長以夫人勲屬籍恩得

官非其好也則杜門里居延師儒以才其子夫人暇日督課程嘗曰汝家羣從預賓薦取科級者項背相望自棄為門戶羞長曰峴嘗以所著文謁丞相益國周公公不輕許可一見峴輒稱異之次曰峴疊疊有立信臣事母太夫人某氏至孝夫人日侍盥櫛不懈益虔太夫人年九秩而夫人奉養如一日紹熙初元夏五月夫人嬰疾秋八月太夫人復嬰疾夫人力疾起進饗鬻治藥物太夫人驚曰汝舍汝療而吾療乎太夫人竟不起冬十

月甲辰夫人亦不起年三十有八以十有二月丁酉葬於廬陵縣宣化鄉朱岡之原信臣以承議郎知隆興府分寧縣陳夢材所狀夫人之行實來謁銘銘曰

寶婺分煒天孫輟機周宗之姬來嬪士鄉宣溪之王淑問用光何恙載纏婦姑後先竭彼下泉養姑於幽不年奚尤樂哉斯丘

太令人方氏墓誌銘

余淳熙七年為廣南東路常平使者而蔡定夫實護漕

事治所皆在番禺是時同列五人而並居番禺者四其
有母者二人而已蓋余母年七十有九蔡母年六十有
五二母生朝兩家交賀同列羅拜奉觴上千歲壽南人
咨嗟以為盛事後三年余母即世又九年蔡母亦即世
定太哀號遣使者以書赴告且持朝請大夫廣東提點
刑獄万俟崧卿所紀夫人行實來抵余曰子昔銘吾父
今可不銘吾母余嘗升堂拜夫人夫人視以子姓者則
哭而銘諸夫人姓方氏諱道堅興化軍莆田人方為莆

大族自秘監而下登巍科歷顯仕者踵接曾祖宿故朝

奉郎祖齊卿故中散大夫父松隱德不仕惟夫人一女

酷愛之必欲配名閥故歸於同郡承事郎通判鎮江府

贈朝散大夫蔡公湍夫人自幼聰而裕淑而恪事親篤

孝嘗欲祝髮為比丘以報鞠育親力止之既嫁奉事尊

章肅恭誠至時其飲食起居色養無違皇姑濟南郡夫

人多疾罕能中其意者樂非夫人所和食非夫人所視

不御躬定省侍匱悅經月不少懈濟南疽於腰幾殆夫

人吮血乃愈每稱其孝為宗族師夫人嫁時橐中裝甚
豐悉歸兩姑而不留其於娣姒姑叔調娛曲盡舉無間
言佐其夫正內以從治家有法大夫公既宅特進憂生
理中微夫人悉力經理攻苦絕甘以濟春秋烝嘗親滌
濯羞簋簋細務至酒鹽醯醢必躬至老遇事迎解緩急
輕重皆曲而當大夫公仰成不知家之有無也教子慈
而不縱幼課以詩書長勉以名節見其子登進士甲科
名次復踐其祖端明之舊五持使節再總軍儲入為館

職為郎為卿為宰士從其子遊宦踰嶺涉湖上漢沔歷
江浙幾半天下人皆榮之夫人以盈為慙每戒其子曰
我為汝家婦逮事乃祖乃祖仕不過二千石汝父一官
四十年而在官僅五稔知汝趾美襲慶今幸有田廬家
不啻足無不知足以貽吾憂故其子安義命恬進取夫
人之教也晚更多難幼子冢婦相繼淪喪夫人不樂遠
適嘗曰我得終於吾廬幸矣其子屢以親老辭寵祿蓋
母之志也誨飭諸女不少弛言動惟法故諸女適仕族

皆宜其夫家待內外姻戚恩稱而禮得馭臧獲不嚴而肅勤儉慈愛出於天性子既宦遊悉力致養夫人必欲均及自享其薄春秋益高以禮自飭歲時宴享肅雍溫克如始嫁婦云性淡泊早受道家錄齋戒之日十居四五晨起誦浮屠書非病疾不廢初遇今天子正位儲宮以子登朝三遇慶壽恩霈自孺人累封至太令人紹熙二年五月乙卯卒於常州之私第享年七十有七男二人長定夫也名戡今為朝散大夫直寶文閣主管建寧

府武夷山沖佑觀次曰武先夫人卒女五人長適進士
鄒彥謙蚤卒次適儒林郎監秦州角斜鹽場孫敏問次
適朝散大夫知信州張稜次適承奉郎監隆興府糴納
食張元渙次適文林郎定江軍節度推官胡鑒孫男二
人康修職郎新建康府江寧縣主簿庾尚幼孫女二人
戡將以是年六月丙午舉夫人之柩祔於武進縣懷德
南鄉譚墅大夫公之墓銘曰

太令之孫端明之婦大夫之妻宰士之母莆宗疇昌維

蔡及方懿厥夫人兩家之光象服斯皇魚軒斯鏘八秩
斯長有煒莆常人知其福莫知其德維碣可泐維德彌
白

夏侯世珍墓誌銘

世珍諱琳夏侯其姓也其先有自譙徙壽春者五季時
為宜春掾因家焉今為分宜人曾祖藩祖敏父繹俱不
仕世珍弱不好弄從羣兒遨習絃誦之聲父異其雋市
書萬卷博延師儒用楸其學一時名公鉅儒若今刑部

尚書蕭公直顯謨閣楊公監察御史艮齋謝公皆折輩
行與世珍交以故耳濡目染前言往行業於厥躬嘗以
文辭薦名春官既給札而父訃告至徒步二千里淚血
醕面骨立足繭見者為動祖母春秋高母夫人在堂弟
娣六人幼不更事生理棼紊總於世珍晝理家夜誦書
奉老者伺顏色盡孝敬字幼者勤教課時昏嫁宗族之
貧者資之失職者業之親鄰之見者勛以善不記其過
正其失卹其灾用是其行信於家其賢著於鄉凡縣令

之省風謠問民瘼必諏度焉袁之庾僑於臨江舊矣蓋
袁之為州地陋田寡粟財堇堇州民必山伐陸取方舟
乘流貿之臨江易粟以輸議者建欲遷庾於分宜世珍
以不便民白州州以聞主計不從至今民病之邑有瀦
澤曰泉塘者溉田晦千而宦者顓利歲有水訟澤不均
宏世珍自詭司水不以租挈有無自源徂流靡不波及
有武經郎巡檢張攜孥之官邕筦客死分宜其孤生十
年矣囊無簪珥存亡無歸世珍聞之既為之棺斂館置

其孤白縣若郡為之上聞其孤授承信郎世珍厚其道
費遣之歸而亡卒胡弄兵略居民逆顏行部使者帥師
討之不能擒賊語人曰得夏侯某一言即降竟平之祖
母母夫人既除喪家議出分世珍與弟姪曰先廬既堅
某姪居之山墅既華某弟居之誅茅水濱吾將老矣邑
有鄉校徙之非是士欲復故世珍攘袂屬役以劬得疾
祀明堂德音詔世珍詣集英西廂奉大對將應書未行
而卒實淳熙十年十一月癸酉也得年五十一初室何

氏臨江人給事某之從孫繼室羅氏廬陵人奉議郎安仁知縣某之女男四人詮謨謙識女五人適進士羅介周穡鄒廷瑞其一許嫁李其一尚幼孫男一人歿將以甲辰十二月二十一日葬世珍於化全鄉德全里赤塘之原詮以文林郎新永州教授歐陽某之狀來請銘某與世珍雅素且親乃哭而銘之曰

傷哉世珍言折其玉言就于木言窆于谷視人以身視疏以親視金以塵無復今人有實在鼎有泉在井可薦可羞

莫予云省我有嘉賓誰其酌之我有窮人誰其收之賓
筵散矣行道嘆矣傷哉世珍古斯萬矣

夫人李氏墓誌銘

故承務郎監淮西江東總領所惠民局胡君泳字季永
之夫人姓李氏紹興府上虞人曾大父高累贈太子太
保大父先擢進士第宣靖間為大御史有敢諫聲紹興
參大政會宰相秦檜主和議公力詆其非坐削爵貶詹
耳檜死復資政殿學士謚莊簡父孟堅氣慷慨方莊簡

在商籍里人誣以私史下詔獄貶夷陵父子各天一方
既偕莊簡復官丞晉陵宰錫山守嘉禾俱以最聞方用
為淮東提舉常平而沒善類嗟惜夫人惠淑莊重容止
有度喜愠未嘗見聲氣莊簡愛之甫齠而祖父俱遠謫
復罹母鄭憂泣呱呱然哀動左右乳下弟疾甚夫人視
不少置卒賴以安姻族稱其孝友忠簡胡公之再謫珠
厓也季永侍行年十有二莊簡見而異之問其始生之
歲辰適與已相似莊簡喜謂忠簡曰是兒氣質不凡為

胡邦衡子而命復類我他日寧為畸人必不為佞人吾
有孫女當以奉箕帚故夫人年十有九歸於胡氏事舅
姑如父母笑言不聞於中閨敬父如賓時節朔望必端
拜視諸姑妯娌如同產未始有絲髮畦畛忠簡嚴於事
先夫人躬視滌濯為諸婦倡季永志遠業夫人以米鹽
自詭不以累其夫至諸姑之有行每輟囊篋相之婦德
優優式是里居忠簡每訓諸女必曰冢婦非而輩法耶
季永官金陵不幸早世夫人才三十有三撫羣幼泣且

誓之死靡他不御鉛澤不服華侈惟飭諸孤從師就學
比其長也皆奮然有立槩始筮仕監鉛山酒稅務以廉
介為今叅政蕭公尚書葉公論薦槩自明州比較務攝
令象山郡太守岳公以尤異薦於朝有旨書姓名於中
書人以為母訓之脩云初夫人念父母家欲其子官於
浙幾一歸省槩既官甬水遂奉板輿以東夫人歸拜松
楸見諸父昆弟心甚喜淳熙戊申冬自象山復還上虞
閱數月以疾卒實己酉七月十日也享年四十有七男

三人長即槩今為承事郎簽書光化軍判官廳公事次
即槩修職郎次程亦好學孫男一人復孫孫女四人婉
孫壽孫粲孫季孫諸孤將以紹興改元五月庚申葬夫
人於廬陵縣順化鄉龍回之原先事以通直郎江州駐
劄御前諸軍都統制司幹辦公事王宗孟所紀夫人行
實移書乞銘於萬里萬里與季永父子間游最故且師
事忠簡公先生其何敢辭銘曰

胡李兩翁儋崖相從婚姻南東一世清風季永年夫

人其艱松雪其寒蘭玉其蕃漕邑言歸言慰其思載馳
一詩嘻其廢而

誠齋集卷一百二十九

欽定四庫全書薈要卷一萬五千七百七

集部

誠齋集卷一百三十

宋 楊萬里 撰

墓誌銘

蕭君國華墓誌銘

君諱飭字國華蕭氏世居廬陵之橫溪曾祖吉祖琇玠
皆隱德不仕父憫字伯寬博聞強記為崇觀三舍名貢
士國華生九歲而孤母朱氏日誦柏舟之詩以自誓是

時兵亂未救強宗內逼豪氓外陵殆無以安其居每羹

藜飯糗教育國華兄弟三人耨以詩書耘以師友國華

幼而穎異長而溫沖方頤廣額重厚寡言事母至孝友

兄弟以義有愉色無間言宵爾誦絃晝而幹營術業有

聞士林稱焉歲在隆興甲申冬國華改葬伯寬而雨雪

兼旬國華憂之前一夕齋沐禱於庭曰天其或者假某

半日之霽得奉窆窆不然請以死報詰朝昃爽雲物開

除日光穿漏得以襄事咸喏國華之孝感云淳熙十年

歲大饑郡守趙侯方講荒政國華兄弟首請於郡願身
先之凡活飢民三百餘人侯甚誼之年三十餘喪室師
王駿子非華元之戒乃於所居之偏別築一堂揭以仁
壽幅巾藜杖徜徉其間槩几明窗爐香獨坐盡繙佛老
之書而呻之中夜夙興終始無倦者五十餘年一日嫡
孫謙侍國華於堂上國華曰居吾語汝吾子孫森然矣
吾年八十有二將何之汝其大吾門乎謙掖國華以歸
沐浴而逝實紹熙二年八月十有七日也國華處已以

敬待人以誠鄉人有爭不詣官府就折衷焉樂善好施
歲飢則倒廩活人豐則脩輿梁並非求利益也子男三
人揆振拱揆好學善談論振拱以乾道間輸粟助賑貸
官奏之朝補將仕郎鄉先生廣西主管羅巨濟器重之
言於部使者檄振以邕州上幕檄拱以封州遂溪尉揆
振皆前卒女一人適周侃孫男七人謙樞權諤謨機紀
皆強學女五人適陳作礪葉孚榮劉榮胡埧劉千秋曾
孫男六人女三人皆幼拱與樞將以紹熙四年七月十

有三日丙子英國華於高澤鄉余陂之原國華所預卜也拱介予弟萬遇以國華之行實來請銘銘曰

岵兮斯徂此兮嫠居呱兮其孤橫溪之蕭衆睨厥巢雨風搖搖予手予劬予口予書其妥歸如既培其根孰薶其芬彼茁者蘭

劉君季從墓誌銘

君諱大同字季從姓劉氏世居廬陵之石塘曾祖華祖珍父逢辰皆不仕父以儒學行義劬躬會友所與遊皆

州里名士嘗從叅政董公學叅政賢之為其子聘其女
焉君生三歲而母胡夫人卒又八歲而孤哀毀已如成
人有兄既壯不壽君撫其猶子而教之因謂曰先人門
戶托予二人若不力學何由自立乃聘士之善講者能
文辭者相與北面師之君種學績文彌久不懈月生日
長從進士舉數無過於有司君學益不懈性謹厚不妄
笑語平居接物色怡氣平惟恐傷之嘗曰與物無競吾
樂也篤親宣慈善行純表終始若一姪寢長欲分田疇

畀之沃壤而已取其瘠焉量入為出不蠅營於錐刀倒廩於貴之歲輒痛損其估以濟人人多德之里有大東塘溉田數十百頃歲久不治將遂圯廢衆憚其費莫敢議其役君一旦視之慨然曰吾田須此水者甚寡然使水既瀦亦衆利也乃捐金鳩民築之疏為溝塍取之不竭早有先備歲大祲吉塘有小溪橫道患無輿梁每雨集暴漲及隆冬凝寒往來者病涉君乃召匠計工伐石他山橋其上費一錢粒粟不徵於人橋成行道呼舞君

之樂於利人類此使天假之年則其推有餘濟不足其
事當益宏大又非今所見聞者比也紹熙三年三月乙
亥君以疾卒於正寢年三十有八娶楊氏賜左中大夫
徽猷閣待制謚忠襄邦義之孫故右朝奉郎都提點坑
冶鑄錢司主管文字振文之女生三男筭譽暮皆競爽
四女許嫁羅步蕭昌齡宣溪王程盧溪王漑泉江郭棲
鳳君卒之明年其孤欲以九月甲申葬君於高澤鄉遙
塘之原前期以迪功郎潭州瀏陽縣丞蕭一致之狀來

請銘於予忠襄子叔祖也主管予叔父也雖予宦游南北與君未覲面然與君親也且聞其賢則哭而銘之曰
訖而不夭壯而不年學而不騫其立匪易其劬匪置其
折匪意莫賢者淵莫孝者騫則亦云然君也何懟子也
可誨庸詎不大

孺人賀氏墓誌銘

孺人賀氏吉之永新人故迪功郎致仕甯君名雋字公
才之妻也元祐宣政間有文名於辟雍號江西大小賀

者其先也父師孟潛德不仕孺人生有淑行嶷然其殊
女紅婦德兼茂並秀二親愛之選所宜歸以適公才入
門下氣怡聲允協上下婦職所宜靡務不輯姑嫜居二
十餘年孺人晨昏肅祇閭內之事稟命無遂紹興丙辰
米斛千錢廩有餘積孺人語致政曰鄉有餓莩積而不
散非仁也乃平直倒廩且為粥於路以食丐者所活甚
夥鄱陽有賊聚不逞掠居民致政女弟之夫為所劫質
孺人聞之號泣傾橐贖之一簪不留致政叔母寡居屢

空字二幼孫栗橡不給孺人白致政迎致於家生養死
葬以所事姑禮事之蚤鞠一孤女自髫及笄訓之劬愉
嫁之數腴閨壺妯娌以為愛女賢於愛子蓋甥也致政
雅好賓客一日無客意象悶悶客至必取車轄投之井
壺觴淋浪豆籩旁午卜夜繼晷盡歡竭貲靡有小靳孺
人躬饋未嘗形惰容乾道之季歲大禋帥叅政龔公奉
詔勸分懸爵傳諭致政謀之孺人孺人喟曰活州里之
饑此吾願也握粟貿官豈吾榮哉且吾兒欲取官以啓

吾家何不讀書於是傾貲市書萬卷旁招名勝秀傑以淑其子居無幾何其子綜貫易經種績藝文琢切新義聲聞日章孺人教也性賤貨貴義梁川甌塗捐金賣珠玉至於浮屠老子之宮固不脩飭州里冠婚喪祭莫能舉者戚疎薄厚周之無倦了無德色一日立子孫於堂下而誨之曰堆金如糞土析利及秋毫此貨殖家者流所謂上策也吾則不然富為怨府利為身仇但免凍餒奚以贏為小子志之淳熙甲申遇上東朝慶貤恩老耄封

為孺人以與致政同日尚書艮齋謝公扁其堂曰華壽
云致政既逝孺人體力康強有加無衰後六年忽晨起
屬疾子孫嘗藥以進孺人却之曰人生百年七十者稀
吾今躋登上壽又奚藥焉復舉似他日堂下之誨言終
而逝實癸丑二月二十有八日也子男三人千齡千能
昌英女二人適進士吳少陽劉藻皆士族云千齡及二
女皆前卒孫男九人有志有謙有秩有功有開有為有
文有永有興俱力學有俊聲女六人適進士曾邁將仕

郎劉崇一談宗元吳有興顏世德其季許嫁劉載曾孫
男四人炳燿輝燧女四人其孤千能昌英命詹尹諏大
蔡葬宜某日地詹尹卜之曰是在嗣歲其月星紀干丙
支午其壙之畧義和之里一牛鳴地石角之潭封之右
臂先事昌英以太常少卿曾公三復所狀孺人之行來
請銘於予先是予嘗銘公才矣今其可辭銘曰

允孝乃姑允恭乃夫允才乃雛其莊其劬金珠之氛羅
縠之塵龜布之緡濯以蘭芬有青者編有鏘者篇有來

者賢儒我子孫子孫昌昌厥閔斯張我銘其藏訖古其
光

通判吉州向侯墓誌銘

侯諱澣字節之向氏河內人丞相文簡公五世孫也少以
父祕閣蔭補將仕郎授右迪功郎再監潭州南岳廟循
右從政郎監洪州脩船塢改宣教郎知潭州安化縣歷
廣西經略司幹辦公事湖北安撫司幹辦公事五轉左
朝散郎錫五品服通判吉州未之官而卒享年六十蓋

淳熙辛丑三月二十有八日也江西舊以官舟轉饌日

漏者輒棄逢侯汝霖摠東西饌事請置船官於洪歲取
舊舟更其十二聽之漕司州不預焉歲久官失併脩舟
艦侯曰是可不正言於轉運使使家是之州不敢強安
化故梅山地拊以誠慤率以公廉稅節賦時氓獠安業
了祕閣憂始祕閣問學於文定胡公故喪祭不事浮屠
法或以為宜禱用俗尚者侯曰先志不可違乃悉遵司
馬氏儀侯執喪哀毀禮無違者母畢夫人先祕閣三十

五年卒旅殯於洪侯方九歲能記其物色至是始克易棺斂骼遷柩又訪收畢氏後自秘閣沒宗族流落異方侯必載以歸而振業之廣右連谿峒官屬之辟置馬政之便宜悉隸帥司幕府侯每贊其長行之盡公桂帥李寶文浩與侯有舊每盡言不隱浩欲於近城為營田從事皆承意籍取逃氓絕產以廣其數侯曰所籍硤确無勤師徒后竟廢之侯嘗至中都故人劉公珙在西府使人問訊侯已於銓曹得湖北掾始見珙珙敬歎久之荆

州再歲易五帥侯澹然自守不可戚疏沈資政復委侯
行城於襄陽為之盡力條具其宜復深器之既得吉之
貳喜曰文簡頃嘗居此官吾甚榮之戍期方及而侯已
病矣曾祖受西京左藏庫副使祖宗琦大中大夫致仕
累贈少師父子志奉直大夫直祕閣致仕累贈大中大
夫自建炎南渡中原故家崎嶇兵亂多失其序祕閣寓
湘中糾合羣從孤繼絕始按程氏書建家廟正神主
嚴祭祀事恩澤生產先猶子後已子長幼雍肅侯率而

守之故江南稱舊族之有家法者曰伊山向氏侯資質
直遇事鯁挺義不可者雖上官亦面折不少借至接親
族慈愛款曲人有緩急傾橐濟之故所至人畏而親敬
而樂方秦丞相檜用事張魏公居二水祕閣家伊山侯
每往來魏公所問起居魏公甚愛重之遂以其姪孫女
妻侯之長子娶黃氏今封太宜人六男士克從政郎武
岡軍武岡縣令士允未仕士克迪功郎永州祁陽縣主
簿士光士寬士先皆未仕四女長適從政郎潭州湘陰

縣丞宋剛仲次適免解進士田奇次適進士王瑛次適承務郎前隨州酒稅李正夫孫男八人女四人尚幼以其年六月十五日葬於法輪寺高塘山祕閣瑩之右從侯志也士克以其壻宋剛仲狀侯之行乞銘於予銘曰富而好禮非貴介公子如彼寒士敏而好學非樂驕樂如金玉追琢故家子孫不泯厥身不阨厥門文獻俱存于湘之濱維伊山之向云

端溪主簿曾東老墓誌銘

子生二十七因入州府謁友人郭克誠郭於曾乎館暄
涼外道舊故未竟主人子出年可十七八許頎然玉立
眉目如畫即之似不能言與之語泉迸雷出予驚喜自
失遂與定交曾其姓枯其名禹任其字也一字伯貢後
更名震字東老云其先金陵人五季徙袁又徙吉之吉
水里曰蘭溪曾大父君彥隱不肯仕大父光遠補將仕
郎至父敏恭始自奮發有志於當世會外舅匠監丞歐
陽珣使敵死焉無子朝廷官其壻三遷知興安縣以宣

教郎致其仕東老結髮不弄不妄言笑入小學日誦數

千言少長發藻蔚甚是時今尚書煥章閣學士艮齋每

課諸生所肄業未嘗不首東老且謂興安曰是將亢而

宗年甫踰冠亟薦於鄉侍興安往官下興安卒東老自

桂林徒跣護喪以歸間關數千里毀瘠骨立見者為泣

奉繼母彭夫人拊二弟四妹尚州允孝族黨州閭稱焉

築文友詠歸二堂旁招明師躬率二弟與其子問業焉

父子兄弟講畫釀郁誦音弦聲洋洋如也以故弟雱雖

蚤世已嶄然露頭角需亦再薦天朝荐行錫類之典母
夫人以東老兄弟得封寵錫便蕃玳翟焜燿歲時舉觴
為壽率子弟拜堂下孝友怡愉叶氣藹然東老自少馳
俊聲人謂一第不足溷也晚乃試集英得仕非東老雅
意也予與艮齋先生皆勉之曰官無小政無不可為君
臣之義廢之可乎相與剡章薦諸朝調德慶府端溪縣
主簿單車之官會郡博士闕府選東老攝焉諸生望其
容貌聽其議論起敬起畏得所矜式秋大比士子謹訟

某官墨不可監試者復選東老攝通判州事往董之鑠
聞語考官曰諸君無陋南州異時張曲江余襄公皆一
代人物之英願留意勿草草既揭榜士稱得人鍾官治
金之課屢殿使者病之符東老行諸郡督其滯還至章
貢遇侍郎趙公彥操經略番禺一見懽甚曰南海事叢
吾億其孰助我予其與我偕開府亟以戶曹掾辟東老
東老為盡力補弊敷繁一府嘉賴鹽使者歲貢盜金每
若干鎰謂之一綱至三未得所宜畀謂東老廉且才俾

盡護以歸水衡東老辭不能使者曰吾求其人久矣微君莫可東老不得已遂行至贛屬疾卧舟中其子克已溯洄及之於西昌則東老病矣然一見其子獨問母夫人安否語訖而逝時紹熙四年十月十日也得年五十有八東老風誼甚高有以患難空乏告者不以有無為解可賙賙之久假不庾不問性不好麗羞服取給未嘗過制至奉先事親則否治家始若不肅終而不弛友朋至隨所有治具爵不踰五客主不及亂罷則談經說理

商略終古紙窗竹屋風雪蕭然寒爐青燈相對終夕人
人自以為得所欲也所居面玉笥諸峰多晉梁隱君子
之蹟嘗暇日杖履往遊每有誅茅山側之興因自號羣
玉隱居言語文章自出機軸無一語襲前作尤喜為詩
平淡簡古深得陳黃句法凡悲歡憂樂登高懷遠覽古
行役一切寓之於詩得若干篇并雜文凡若干卷目曰
羣玉集又於書字畫道勁人比虞褚云藏書數萬卷又
得歐陽氏故書數千卷閣以皮之終日徜徉其間雖陰

陽卜筮天官地理浮屠老子之說無不綜貫人有問者
隨扣隨應時輩見謂殫洽配毛氏同邑貢士穎士之女
先東老二十三年而卒男子克已克允克寬克家皆嗜
學克已克寬嘗預秋薦二女長適朝散郎荆湖南路安
撫司幹辦公事陳夢才之子東次在室孫男女二人尚
幼諸孤厝東老於仁壽鄉佛塔岡之原將以十二月已
未塋克已持陳君夢才之狀來見拜且哭曰先君子辱
先生與游先生不銘之孰銘之銘曰

近世勃興蘭溪之曾蘭玉盈庭四士收科東老則那暨
仕而睹二士舒英曲臺承明東老伶俜文行可傳詩可
管弦人後已前其生不昌其死不亡東老何傷

臨賀太守簡公墓誌銘

公諱世傑字伯俊姓簡氏其上世遠矣周有大夫師父
漢有昭德將軍雍至公之先自建業徙豫章今為進賢
人曾祖真祖英世有隱德考喬累贈朝請郎妣安人宋
氏公自幼穎異讀書略章句要為有用之學隆興癸未

第進士授左迪功郎辰州錄事參軍丁父憂服除調靜
江府司理參軍有兄弟殺人者吏當以重比且連坐公
閱其實弟初不與謀卒以讞奏外邑盜上府凡六七輩
府以屬公公物色非是出之後果獲真盜時參知政事
范公成大為帥將重劾邑令而請賞公公力辭范公薦
公治獄詳明有詔記公名於中書載籍淳熙初元范公
徙鎮全蜀辟署公為四川制置司準備差遣蜀自中興
以來置帥尤重於時頻易帥西南夷寇邊前帥坐免至

是邊防機事范公專以委公公悉心贊贊夙夜不懈所
辟客惟公一人相倚如肺腑邊備稽飭則考論西蜀利
害次第興除其大者如對減折估歲十五萬緡罷關外
四州之和糴以蘇民力實自公白發其端蜀人大和異
時士大夫有謁於制司者不得則讙幕府故僚屬往往
怵於權利公庶已和物援寒畯通下情事有未安必盡
言不阿范公虛心以聽尚書鄭公丙手書以貽云聞蜀
士翹楚皆為范公得可謂自吾有回門人益親范公召

還薦公於上前乞不次擢用上方留意吏治以公新改
秩詔中書除知鄂州蒲圻縣當承平時賦入甚夥今視
舊十不能一且經界不正徭役失平以作業若干訾民
民皆竄易名數吏手得以上下公下令覈欺隱第甲乙
為書藏之有司至今利焉頻歲荐饑振廩勸分境無流
莩諸使者列公治行以聞有詔秩滿詣中書察廉丁母
憂服除通判靖州靖深入五溪環以夷獠居民土爬山
耕荒徬相望而官賦無定式錢曰經總制者歲五十萬

其出無從往往虐侵巧奪以啓蠻心公乃察撿贏餘相
為補除削其苛政蠻官林順才要者結五砦坎用牲於
夷鬼將有異志公諜知之亟白郡守遣腹心諭以禍福
莫搖聽命有羅鬼蠻者開山通道以馬市為名包藏不
測符公經紀其事公躬涉險阻創立砦柵折其姦萌邊
以無事於是丞相趙衛公與諸使者以公才能列於朝
除權知賀州入見紹熙新天子因問公往在制幙成都
權酷之課近年益殿何也公對以昔趙開籠醯薺酒之

利以佐軍興此猶張弓也今數十年不弛民其有不困乎比年西蜀歲豐物賤而民愈貧養生之需有急於酒者課之殿也則宜上深然之元年冬公始至郡首修孔子廟及郡學民知公意在教化相率服從巖外自鹽婁更復用官自鬻之法民以為病公一切罷之乃痛自酌損必由身始齋厨不炊賓筵生塵佐吏服其清苦云諸使者疏一道郡守之課以公為第一書聞而公已疾矣以紹熙三年十月十有七日致其事未幾卒享年六十

有六州民罷市巷哭官為朝請郎假服三品娶帥氏靖
安貢士亢之女封安人子男三人約綸紳約紳先亡女
五人二女早夭次適進士呂仲良次適進武校尉新監
潯陽鎮酒務葉洪幼許嫁進士葉沂孫男二人廉度孫
女四人公風度凝遠不形喜愠其學問通古今其議論
守大體其好善出天性試進士為范公所識拔因是游
公之門及在廣蜀再為其屬主賓相懽金石不渝及范
公退歸公亦婆娑於外范公所薦蜀士數十人公為之

首同薦輩流有至執政者公了無羨心當路諸公有欲
鉤致竟謝不往初公官粵蜀皆單車之官妻子不至官
寺暮年安人及其子始偕往臨賀更未盡安人先歸聞
公訃悲傷感疾而歿綸將以明年二月甲申奉公及安
人之柩合葬於靖安縣長安鄉石馬岡予與公雅素且
厚綸以公壻眉山呂仲良之狀來請銘則哭而銘之曰
范公帥蜀載萬隻玉歸獻黃屋大者鈞樞小猶伏蒲刺
天魚魚上客伯俊而馬不進卒老於郡我能非賢我否

非天母悼下泉

夫人鄒氏墓誌銘

夫人鄒氏世居臨江軍新淦縣曾祖復祖昌齡父敦禮
昌齡字永年大觀間登進士第終建昌士曹敦禮字和
仲紹興初乙科登第仕至通直郎贛州節度推官鄒氏
世儒而士曹教子尤篤嘗仕於衡因家焉故通直兩以
貢士冠於衡又以類省試冠湖南娶衡人都曹谷氏之
女谷夫人適鄒氏兩族薦紳文學相高禮法相礪故諸

女日閑訓誨夫人有女德通直尤愛之每曰吾此女不
妄與人紹興丙子朝廷行鄉飲酒禮縣尹黃君鉞與人
士約試畢而後行禮於是曾君德賢以書一經就試黃
君喜其文及行禮通直攝俟介事黃君出德賢文卷示
之且於行禮間覘其人物儀矩秀茂通直一見傾蓋遂
許以夫人歸之夫人歸曾氏時德賢之大父仲平年七
十餘方康彊好歡樂其子慶美慶善日娛侍左右夫人
於妯娌間序為下陳凡膳羞牢醴頃刻而辦仲平得優

游晚歲與親賓相娛悅雖其家之肥亦夫人先意承志之助仲平既終而慶善夫婦亦老矣夫人下氣怡色昏定晨省奉醴以進必極其旨奉饌以進必極其豐退又探其所嗜羅列而進慶善尤喜賓客每與客燕集必卜其夜式歌且舞曼衍畢陳以極賓歡彌日乃罷其蔬果暇脩山膚海錯何珍不致徹已不進慶善每喜其後春秋益高牙車豁搖宰夫烹熬皆不合意至夫人刀匕所供每事必嘗曰有婦如此吾無飢矣方其時慶善二女

將及笄其長子德元適早世孤女三人俱幼慶善夫婦
既愛其女擇對維艱又憂其孫之無歸夫人於視膳間
必寬其意願以身任至五女者言動視聽織紉纂組必
手攜面命俾如內則之禮慶善視女若孫婉婉聽從嘆
曰微吾婦之賢疇克爾厥後以其長適臨武今奉議郎
蔣君昂其次適靜江府觀察支使文林郎洪君光謙諸
孫亦各擇良匹而嫁之其橐中裝皆夫人協力營之加
隆乃已蔣洪二君既歿則又勸德賢收卹其孤淳熙乙

已慶善夫婦與德賢兄嫂相繼而逝德賢治喪哀毀不

支夫人晝夜哭臨總齊內外及至葬車轍填門夫人戮

力應接終日忘食由是感疾紹熙辛亥幼子娶趙氏尤

為夫人所愛入門未幾而卒夫人益哀由是疾篤以是

年十二月二十日終於正寢享年五十有五子男二人

千能千齡女五人長適從政郎新州新興縣令李昌齡

次適迪功郎建昌軍司戶叅軍胡卿月餘在室夫人生

於儒家甚德而度禮無違者敬事尊章為諸姒率同室

千指俱無間言下而媵僕撫柔慈惠各適其意方德賢
少之時篤志問學求師結友夫人經紀家事井井不紊
逮子之長訓誨尤力好學之士願與子游者悉招延之
故其子學以成每母子尊俎談笑間時以姬女誠及今
古列女傳反覆評論聽者忘倦鄉里之為婦為女者是
則是式其孤以今年某月某日歸夫人之柩於同鄉西
江之石蘭原前期千齡以迪功郎新廣州增城縣主簿
劉汝明之狀來請銘於予予與和仲居則鄰郡官嘗同

僚和仲江西詩人也夫人當能詩而未聞者何也銘曰
伯喈之子封胡之姊林下之風閨中之懿婦德婦言彤
管有煒宣無胡笳之辭應有柳絮之詩胡不傳兮應見
其二子而問之

安人王氏墓誌銘

安人王氏慶人也贈少保茂之曾孫樞密副使資政殿
學士贈太子少師庶之孫知歸州之道之女朝請大夫
直祕閣張公允蹈之介婦朝奉郎新通判隆興軍府事

爽之妻也爽字叔保叔保當靖康初侍直閣公崎嶇兵
間自亳社南來居廬陵今再世矣安人自幼警悟德性
敏淑樞使尤所鍾愛遴擇名閥良對年十七歸張氏時
直閣公猶未脫吏部選賦祿甚薄兒女在髫髻者數人
尤重義好客有無盡費安人不逮事姑歸先長姒閨閭
之政一出經理仰盡父禮俯育諸幼盡斥簪珥以葺生
理初年堇堇今則裕如穉者壯壯者嫺聘不汰裝不褊
粵自設帨首造祭器祭日必躬滌濯必致豐潔如是者

終其身年既莫止子婦滿前不以屬也張氏有遠屬三女落南直閣公歸而字之未及適人公已捐館安人力贊叔保擇可妻者費皆已出不靳叔保異居從弟兩孤女貧不能嫁安人尤不忘俱有歸已有孤姪則納為仲子婦仁及中表舉族親間範馬楷馬叔保莅官所至有聲亦惟內助實賢不以秋毫家事為官事累延師儒以淑其子弟尤篤平時自奉苦淡不妄費一文至賙人急難忻然傾倒遇媵妾不可犯而無小大皆懷其恩紀先

是柄臣當國樞使公以異議退居江之德安薨子之奇兄弟為其下所告時直閣公為邑長為白其誣再告於朝直閣公坐殿課之奇謫嶺表道廬陵謝直閣公曰一日見天日誓不忘後之奇簽書樞密院事有舉前恩賀叔保者安人獨曰此古人所絕口者報亦不及語孟詩史皆蚤歲成誦每與家人語輒訓以古義初封孺人再封安人五子履賁隨臨觀孫男三人孫女七人屬續無他語惟勉諸子以學且深念叔保孰當為舉案者實紹

熙三年五月二日也得年六十有一里之人見者盡聞
者惻至出涕曰安人之賢而止於斯卜以九月十三日
葬於廬陵縣高澤鄉永和鎮新莊之原將辟叔保以其
女弟之夫監察御史曾公三復所狀安人之行來請銘
銘曰

外家方屯燾以捐身尊者之仁外家復興不噓於庚親
者其宏北客南翔家孰其昌今稱曰張非鸞疇依非曜
疇齊不偕其耆

欽定四庫全書

誠齋集

誠齋集卷一百三十